

No Servus, Diener und Habe die Ehre!

Etze kummt dos

Nej su wos

vu Sömde, n 29. Juli 2023



O. Michael Siegmund

Uf n Hund gekumm

Mitte dr nontschr Juhre kom bei uns ei dr Familie de Diskussion uf, ob mr sich amende enn Hund zulehn sellte. De Kinder und de Froue worn sehr drfier, wuegen iech ollrlej Bedenkn eis Fald fiehrte, wos su a Hundebesitz ou fr Vrpflchtungn mit sich breng wiere. Mr misste dos Tier drzieh, jedn Tag Gassi giehn, mr musses impfn lossn und an Urlaube kuckn, ob mr enn Hund drbeine hon dorf, und - wenn ne - ob sich jemand öm dos vierbejnliche Familienmitglied kimmrn wiere, wemmr n an Ferien drhejme lossn mißte. Leidr sein menne Argumente ne drhiert, villmieh ols ne relevant eigestuft wurn, su doß de schlußendliche Obstimung mit 5 zu 1 zugunstn vu dan zukinfichn Haustiere ausgefoln wor. Su sein mr an Juhre 1996 an wuhrstn Sinne des Wurtes ufn Hund gekumm!

Wie mr unsrn „Dusty“ - dan Nom hout dar klejne Welpo drnourn vu uns gekricht - aus annr Hobbyzucht vu enn Paurnhofe obgehullt hottn, fing glei dos orschte Problem o, weil dar Karle aussr Wiesn und Faldm kenn andrn Undergrund kannte. Dasterwajgn worsch ne meglich, dan Hund vun Gortn aus ufn geteertn Houf zu breng. Dou blieb a eifach liegn und wor kenn Zantimetr wattrzubring. Wie dos Problem mit dr Zeit geliest wor, kom a nächstes drzune. Dusty hotte enn geherichn Reschpekt vur Zebrastrejf. Ich sah mich noche, zun Vrgniegn vu diversn Autofohrern, iebn Zebrastrejf vu dr Sudetnstrousse loufn, mit enn klenn Hund o dr Leine, dan ich wie enn Saak Mahl hindr mr harzoug. Vu siech aus machte ha kenn ejntschn Schriet allejne, wenn a Zebrastrejf ei Sichtweite kom. Obr irgendwann wor dann ou de „Zebrastrejfnphobie“ iebwundn.

Wie unsr Hund grissr und selbständicher wor, ös a ofte allejne uf Tour gegangn, weil a mrscheints seine Gene iebn de weiblichn Artgenossinnen zengstömang unbedingt wattrgahn wollte. Ville Noppn mit Hündinnen kanntn unsn Dusty bale sehr genau. Und su ging öftsch om Tage unser Telefon, unser Dusty sei wiedr amoul dou und mr mecht dan Luderkarl doch bitte hoste wos konnte wiedr obhulln kumm, wenn mr sich zukinfiche Alimente drsporn welltn. Ich weiß nemieh, wie ofte ich dan Karle midn VW-Busse wiedr wu eikassiert ho.

Ejmoul wor unser Hund o enn Oubde ganz vrschwundn. Mr hon n ieberole gesucht und römtefoniert, ob war dan Schlawienr gesahn hätte. Sugor bei dr Polizei wußte kejs ne wos vu enn zugeloufnen Retriever, uf dan unsre Beschreibung geposst hätte. Om nächstn Morne kom ich uf de Idee, an Tierheime ei Beckstettn ozuruffn. Und tatsächlich hotte unser Ausreissr dorte ane Nacht an Zwinger mit Friehstick zugebrocht. Und dos wor su gekumm: Unser Vierbejnr hotte n holbn Nouchmötz vurn V-Morchte ei Neugablunz gelehnt und fasziniert dr Hindrbrouterei zugekuckt. Ane Froue houtn scheints drbeine ane Weile beoubachtet, und weil kejs sich öm dan Dusty kömmrte, hout se de Heckklappe vu ihrn Auto ufgemacht, unsn Hund eigelodt und n schnurstracks eis Tierheim nouch Beckstettn transportiert. Dar Ausreissr ös obr ou ei a jeds Fohrzeug neigehoppt, wenn arnewu a Koffrroum ufging.

Dos worn su de Geschöcht, die mr mit unsn Hunde drlabt hon und ich muß sohn, doss de fuffzn Juhre, wu a Tejl vu dr Familie wor, trotz ollr Drlabnösse wöcklich ane Berejcherung worn und niemand de Zeit midn missn mechte. Denn uf anne sötte Ort ufn Hund zu kumm ös wöcklich ne ieb! Mejntr ne ou?
